

15.november 2016

**Nunatsinni ingerlatitseqatigiiffiit tamakkiisumik ilaannakuusumilluunniit Namminersorlutik Oqartussanik pigineqartut naalakkersuinikkut qanoq ineriartortinnissaannut kissaatigissavavut, tassungalu ilanngullugu sinneqartooruteqartarnissaannik, iluanaarutininik kiffartuussinik-kullu inissisimanissaannik sutigut piumasaqaateqassanersugut pillugit apeqquteqaat aallaavigalugu oqallinnissamut siunnersuut.**

(Inatsisartunut ilaasortaq Mimi Karlsen, Inuit Ataqatigiit)

Inatsisartunut ilaasortap Mimi Karlsennip apeqquteqaat aallaavigalugu oqallinnissamut siunnersuutaannut qujalluta Siumumiit imaattumik oqaaseqassaagut.

Nunatsinni ingerlatitseqatigiiffiit tamakkiisumik ilaannakortumilluunniit Namminersorlutik Oqartussanik pigineqartut ingerlatsitseqatigiiffiupput nunatta inuininik kiffartuussinikkut pisariaqartitattinnik matussusiisussat.

Oqaaseq namminersortunngorsaaneq namminersortunngorsaanerullu pitsaaqqutai pitsaannginnerusortaalu nunatsinni politikikkut oqallinnermi nutaarsiassaangillat.

Nunarsuarmi nunat aqqissugaaneri pisortat qanoq annertutigisumik inuiaqatigiit inuunerannut aningaasarsiornerannullu akuleruttariaqarnerannik ilutsinik assigiinngitsorpasuarnik takussutissartaqarput.

Eqqarsaraannilu namminersortunngorsaanerup tamatigut unammillersinnaaneq kiffartuussinerlu pitsannerusoq qularnaassagaa immitsinnut aperisariaqarpugut nunatsinni innuttaqqortussuseq aallaavigalugu ilumut isumatusaernerunersoq. Ingerlatitseqatigiiffiit Namminersornerullutik oqartusanik pigineqartup soorunami tamatigut siunerfeqartuartaqarput iluanaaruteqarfiuallaarnatik ingerlatsinertik atuisunut tamatigut nammakkuminarnerpaamik ingerlatsissagaat.

Tamattami soqutiisaraarput ingerlatitseqatigiiffiit piginneqataaffigisatta aningaasanik sinneqartooruteqarpata inuiaqatigiit piginmitsimi atugaannut pitsanngorsaattit atussagaat. Tamanna assigiinngisitaartumik paasineqarsinnaavoq, pitsanngorsaanerimmi akinik appaanermit ingerlatsitseqatigiiffiup atortumigut pitsanngorsaanikkut ingerlassinnaammagit.

Oqallinnerli manna tungavissaqarluni ingerlanneqassappat takussutissanik misissuineruillu pisariaqartitsivugut. Ukiq manna ataatsimiinnitsinni qulequtaq Namminersortunngorsaanerup kinguneri sinnaasai pillugit isumalioqatigiissitamik pilersitsinissamik siunnerfeqartoq suliaarput, tassungalu atatillugu Naalakkersuisut allannguutissamik siunnersuutaat ataatsimiitsitaliami amerlanerussuteqartunit akuerineqartoq naammassisussaassavarput, tassani Naalakkersuisut peqquneqassammata nalunaarusiussasut ingerlatitseqatigiiffiit tamakkiisumik ilaannakortumilluunniit Namminersorlutik Oqartusanit pigineqartut namminersortunngorsarneqarpata isumatusaernerunersut.

Taamaattumik oqallinneq tungavissaqarnerusoq pigalugu qulequttap qaqeqqinneqarnissaanut Siuumumiit qilanaarpugut. Nunatsinni ikittunnguuvugut, siammasissumilu nunasseriaaseqarluta, tamatigullu qularnaarniagassaraarput atugassarititaasut akillu innuttaasunik nammanneqarsinnaasut pilersissallugit. Unammilleqatigiinneq peqqinnartuuvoq, taamaakkaluartorli namminersortunngorsaaneq immiini aamma unammillerteqanngippat atugassarititaasut ajorseriaateqarsinnaaneri mianerilluinnarneqartariaqarput. Naligiimmik assigiimmillu periarfissaqarneq anersaaralugu nuna piorsaa-vigineqartariaqarpoq, sutigullu aningaasatigut nunatsinnut iluqutaanerpaamik namminersortunngorsaasoqassappat misissuineq pisariaqartipparput tassani tungavissaqarluta qulequttamik oqalliseq-qinnissarput qilanaaraarput.

Taamak oqallinnissamik siunnersuuteqartoq qutsavigalugu oqallilluarnissamik kissaassivugut.

Vivian Motzfeldt

Siumut